

'Gelora dan perselisihan' merebut kuasa hancurkan parti — Abdullah

UM 18 JUN 2013

KUALA LUMPUR 17 Jun — Timbalan Presiden UMNO, Datuk Seri Abdullah Ahmad Badawi mengingatkan ahli-ahli mengenai kejatuhan dan kehancuran parti itu akibat 'gelora dan perselisihan' merebut kuasa.

Beliau turut memberi amaran jika gejala itu tidak dibendung secara tegas dan berani satu hari kuasa UMNO dan politik Melayu boleh luput sama sekali.

"UMNO ditubuhkan untuk menyatukan Melayu, untuk membela dan memperjuangkan nasib bangsa Melayu. UMNO bukan gelanggang 'litar kereta' untuk berebut kuasa sehingga jawatan dijadikan kiblat perjuangan.

"Perebutan jawatan telah seringkali menghalalkan cara, telah berulang kali membawa kepada keruntuhan nilai, sehingga kawan menjadi lawan. Perpaduan di dalam parti sanggup diretakkan - perpaduan sesama bangsa sanggup dipecahkan kerana jawatan," katanya.

Beliau berkata demikian ketika merasmikan secara serentak Perhimpunan Agung Tahunan Pergerakan Wanita, Pemuda dan Puteri UMNO Malaysia di Dewan Merdeka, Pusat Dagangan Dunia Putra (PWTC) di sini, malam ini.

Dr. Mahathir dalam wawancara khas dengan

Mingguan Malaysia, Ahad lalu melahirkan kebimbangannya mengenai perebutan kuasa di peringkat kepimpinan pada pemilihan UMNO tahun depan.

Dalam ucapan Abdullah bertemakan *Mengurus Kejayaan*, Timbalan Perdana Menteri itu berkata, kejayaan yang dikecapi sekarang seringkali membawa kepada khayalan dan rasa terlalu selesa.

Menegaskan lagi mengenai soal kesan perebutan jawatan, Abdullah berkata, menyokong individu lebih diutamakan dari menyokong parti dan survival individu lebih diutamakan dari survival bangsa.

Pertandingan dilihat sebagai peluang mendapat keuntungan diri.

"Nama baik pemimpin sanggup dihitamkan kerana terpengaruh dengan ganjaran upah. Kuasa undi dinilai dengan ringgit.

"Ingatlah calon yang membayar upah telah juga mengambil upah lebih besar daripada pihak lain. Calon yang mempengaruhi perwakilan untuk menjual maruah telah lebih dahulu hilang maruahnya sendiri," katanya.

Menurut beliau, kelangsungan UMNO bergantung kepada niat dan pegangan ahli. Semangat juang untuk parti janganlah berakhir dengan tempoh masa menyandang jawatan iaitu

selagi diri diberikan kedudukan dan imbuhan.

"Sebaik sahaja kehilangan jawatan, sebaik sahaja kehilangan kedudukan, sebaik sahaja gagal mendapat imbuhan, kepimpinan parti diugut, dicera, diserang secara berdepan, ditikam dari belakang dan orang yang dipilih menggantikan tempatnya, dipulaukan pula, tegas beliau.

Sambil mengajukan persoalan, beliau berkata, selama manakah parti akan menanggung sarat daripada ahli yang berfikiran sempit?

"Selama manakah pemimpin parti harus tunduk kepada ugutan ahli yang berjiwa kecil?"

"Menghadapi ahli parti yang berfikiran sempit dan ahli-ahli yang berjiwa kecil, sebenarnya lebih membebaskan dari menghadapi musuh, lebih berat dari menghadapi parti pembangkang," katanya.

Ahli-ahli seperti inilah, kata beliau yang membebaskan UMNO dan menangkan pembangkang dalam pilihan raya.

"Ahli-ahli seperti inilah yang berada dalam tahap 'kekecewaan' yang boleh membawa parti ke tahap 'gelora dan perselisihan'. Jika tidak dibendung secara tegas mereka akan membawa parti ke tahap 'kejatuhan dan kehancuran'," tegas beliau.